



KOALICIJA ZA BORBUN PROTIV GOVORA MRŽNJE I ZLOČINA IZ MRŽNJE
КОАЛИЦИЈА ЗА БОРБУ ПРОТИВ ГОВОРА МРЖЊЕ И ЗЛОЧИНА ИЗ МРЖЊЕ
COALITION FOR COMBAT AGAINST HATE SPEECH AND HATE CRIME

Saopćenje za javnost Koalicije za borbu protiv govora mržnje i zločina iz mržnje povodom nedavnog izazivanja nacionalne i vjerske mržnje, razdora i netrpeljivosti u Republici Srpskoj

Sarajevo, 25.10.2013.godine

Koalicija za borbu protiv govora mržnje i zločina iz mržnje najoštrije osuđuje verbalni napad na Bakiru Hasečić, predsjednicu Udruženja žrtava rata iz Višegrada koji se desio 25 oktobra 2013. godine.

Verbalni napad se desio ispred njene kuće u Višegradu, kojom prilikom je gospođa Hasečić bila izložena vrijeđanju i zastrašivanju na nacionalnoj i vjerskoj osnovi, sa elementima zločina počinjenih iz mržnje. Napominjemo da se napad desio samo nekoliko dana nakon što su čelnici opštine Višegrad odobrili rušenje kuće u Višegradu u kojoj je spaljeno 70 žrtava ratnog zločina.

Nevladine organizacije - članice Koalicije za borbu protiv govora mržnje i zločina iz mržnje smataju da reakcija lokalne policije koja je napadačici uputila usmenu opomenu nije dostatna, radi čega je potrebno daljnje uključivanje policije i tužilaštva u cilju rasvjetljavanja ovog slučaja i prevencije sličnih slučajeva u budućnosti. Podsjećamo da je nekažnjavanje govora mržnje i zločina počinjenih iz mržnje, kao krivičnih djela koje u svojoj osnovi imaju podrivanje jednakosti i ravnopravnosti građana i marginaliziranje pojedinačnih društvenih grupa, predstavljaju prijetnju miru i stabilnosti u BiH.

Ovim putem želimo naglasiti da Republika Srpska treba odlučno primjenjivati postojeće pravne norme, koje su sastavni dio krivičnog zakonodavstva, u cilju pružanja adekvatne zaštite ljudskih prava svih svojih građana/ki. Koalicija poziva policiju i pravosuđe Republike Srpske da adekvatno reaguju, procesuiraju i osude ovakve i slične slučajeve, te profesionalnim obavljanjem svog posla sankcionišu svako krivično djelo **zločina iz mržnje i izazivanja nacionalne, rasne ili vjerske mržnje, razdora ili netrpeljivosti** koji su kao takvi definisani Krivičnim zakonom Republike Srpske.

Koalicija za borbu protiv govora mržnje i zločina iz mržnje, osnovana je u januaru 2013. godine, uz podršku OSCE-a i Civil Right Defendersa, a čine je Asocijacija za demokratske inicijative, Inicijativa mladih za ljudska prava Bosne i Hercegovine, Mediacentar Sarajevo, Sarajevski otvoreni centar, Udruženje/udruga BH novinari, Vijeće za štampu u Bosni i Hercegovini i Fondacija CURE. Glavni cilj formiranja Koalicije jeste zagovaranje za adekvatnu regulaciju govora mržnje i zločina iz mržnje u krivičnom zakonodavstvu oba entiteta i Brčko distrikta Bosne i Hercegovine, te harmonizaciju krivičnog zakonodavstva.

Koalicija za borbu protiv govora mržnje i zločina iz mržnje